

Гужем яратон

*Шунды пиштэ, пилем лобзе,
Тол бёрсы гужем вуэ...
Кин ке но вера вал мыным,
Мон мар понна та улонын?*

Со гужеме шунды ик мукет сяин пиштйз - аслэсьтыз яркыт тылсиоссэ со жалятэк кисьтаз музьем вылэ. Мар борды гинэ өз йётскылэ со тылсиос, ваньмыз тырмылйз шунытэн, кудйз пеймыт уйин но өз бырылы - шөдйськылйз котыр омырын.

Одйг котомкае кулэ арбериоссэ но дйсьсэ тырыса, Дима пуксиз валес вылаз. Тани нош ик ортчиз дышетскон ар - куинетй курс кылиз бере. Йыраз берпуметй толэзьёсты бергатйз - солы потйз, ваньмыз уйвөтын кадь ортчиз шуыса. Али гинэ экзаменьёслы дасяськоно вал кадь, нош табере быризы соос но. "Чаляк ик дыр мынэ", - малпаз со ас понназ, собере султйз но, котомказэ ныпьяса, потйз. Бетон борддорьёс вискын так но уг чида вал улыны, нош таёе жокыт куазен тужгес но. Соин, кема жегатскытэк, берпуметй дышетскон нуналаз ик шонтйз автостанцияе. Азьло аръёсы кадь ик, тазэ гужемзэ со малпаз ортчытыны гуртын, кытын улэ вал песянаез.

Калык автобусын тачак вал. Удмуртарняе всяк озыы луэ - адымиос, кудйз пöлын троггес ачиз кадь дышетскисьёс, берто доразы. Пиала сьöрын пумен ог-огзэс вошъяса ортчылйзы жужыт нюлэсьёс, паськыт бусыос, пöртэм гуртёс. Соос шоры учкыса, Дима өз ик вала, кызы ортчиз кык час ворттонэз, но автобус вуиз солэн гуртаз. Сюрес жадьытйз пияшез - вуэм безаз со валес вылэ выдйз но жамак умме усиз.

Чуказеяз Дима мынйз Андрей доры.

Андрей вал Дималэн матысь эшез. Соос пичи дырысенызы тодмо ини. Куке Дималэн анай-атаез кельто вал пичи пизэс гужемлы песянайзы доры, со нырысь ик кошке вал Андрей доры. Чошен соос шедьто вал мар ужаны: яке чорыганы мынозы, яке Андрейлэн песятаез вöзын бергалозы, кудйз огшоры пуллэсь пöрмытылэ вал паймымон арбериос, яке чик юаськытэк атаезлэн мотоциклэныз ворттылыны потозы. Йыртэманы но юрттйськыны но вуттылйзы - мöзмон дырзы чик öй вал.

Шунды чукнаысен пыже ни вал, соин ик пиос, кема малпаськытэк, кошкызы тымет доры сйялскыны.

Тымет дорын адымиез трос öй вал на: көня ке пичиос пöртэм буёло пыласькон арбериосын пальккетто вал зарезь вöзын. Андрей, кызы вуиз, жамак вылй дйсьсэ куштыса, зымиз мургес аяз. Жоген Дима но сьöраз пыриз. Кема ик дыр өз ортчы, соос потйзы зарезь дорысен бадзым вис кельтыса. Татын, пидлон, вуэз ик салкымгес вал. Көня ке огшоры уяса, Дима берытскиз тыбыр вылаз. Киоссэ палэнэ лэзьяса, выйонтэм вылысь, со пиштйсь шундылэсь синьёссэ кыниз но вань мугорзэ буйгатыны тыршиз. Мугорыныз валче ачиз но басылак луиз. Котыр шыпыт: ву пыр пель дорозяз уг вуо куараос; яркыт шуныт шунды, вирсэрлы сйялэс ву - кылылы но кылылы вал тазыы. Одйг та понна гинэ бертан яра вал гуртэ. Соку Дима уг тоды на вал, таёе каньыл мылкыд луэмез берпуметй луоз но жоген солэсь сьолэмзэ пилёзы шуыса.

Угось, огпол пилем сюлэмез номырин но уд лякы ни, уд бурмыты - со всяк кыллэз секыт возъетэн адямилэн пушказ.

Вуысь потэм бераз, куасътйськыкуз, пыласькон доры вуиз Лика.

- Эчбур, Дима! Мон ой но тоды на вал, тон бертйд шуыса.

- Чырткем. Мон кылем жыт гинэ вуи вал.

- Мм.. Озы шат, я иське. Нош мар огнад, кытын Андреед?

- Вуысь өз поты ай. Тйни, - синъёсыныз возьматйз пияш.

Нылаш көня ке сылйз ай вөзас, маке веран турттыса, но вылысьтыз дэрэмзэ куштыса, вамыштйз ву доры. Вуэ пырем бераз, со берытскиз но шуиз:

- Тыныд Андрей өз вера, луоз, соин тон уд тодйськы на, дыр. Азьвыл көснулалэ со Ленаез кураны ветлйз. Соослэн толэзь ортчыса сюанзы луоз.

Дима та кыльёс бере шуккем кадь луиз, каньыл мылкыдыз чапрак төлзиз. Пияш малпаськонэ усиз.

Өвөл, озы уз луы. Лена, кудйзлы Дима синмаськемын вал, матысь эшезлы - Андрейлы - бызе. "Лика алдаське, луоз. Со быгатоз!" - өз оскы нылашлы пияш. Ачиз нош Андрей сярсы утыр малпа. Тодаз вайиз солэсь адзиськем тырысенызы өжыт вераськемзэ - мае ке но ватэ кадь. "Мар мон татын тунаськыса кыллисько? Тани Андрей потоз, аслэсьтыз ик юало..." - малпаз Дима. Куинь ар талэсь азьло соос пöлын кылдйз ни вал керетон одйг нылаш понна, соку вормиз эшъяськонзы. Со тырысен соос вераськызы, но кычө но нылаш эшъяськонзылы пумит уз султы ни шуыса. Но Андрей потэм бере но, скорес вылтй бертыкузы но Лена сярсы Дима солэсь өз юа. Көня ке кенешизы куазь сярсы, өжытак пинал дырзэс тодазы ваизы но, "чуказеозь" шуыса, люкиськызы.

Гуртаз ини, сиськыкузы, песянаезлэсь юаз:

- Бабу, зэмзэ ик а верало, Андреен Лена кышноясько шуыса?

- Бен, монэ но отизы. Тыныд Андрей өз вера шат?

- Öz. Ма, мон ой но юа...

Жытазе, бакча емышгёс вылэ ву кыстам бераз, Дима шонтйз гурт пумысь вырйылэ.

Йылаз ик тубыса, со пуксиз, киосыныз пыдесъёссэ зыгыртыса, но учкиз гурт шоры. Татысен ваньмыз кыпидэс вылын кадь адзиське вал. Тани кижикожипичи гинэ шур пыре гурт пушкы но люке сое кыклы. Нырысь со ортче бамал улысь возь вылтй, собере, гуртэ пырем бераз, со шурез келяса, урдэсьестйз лэзьясько жужытэсь но вакчиесь бадьпуос. Көня ке палэнын сылэ кызыпу парк. Со вöзын кык этажьем школа. Мукет палаз, гурт вылланын, вал ферма но колхоз гаражгёс.

Йыр вылысь пеймыт лыз инбам инвис пала кыстйськыкуз, кудйз сьöры алигес ышиз шунды, пумен лемлет буйем кариськылйз. Со лемлет инбам вылтй каллен гинэ, оло воксё дугдйллям кадь, уяло вал өжытак пичи бусйр пилемгёс. "Сычө чебер жыт, нош кычө шötэм мылкыд - бöрдэм ик потэ!" - малпаз соку Дима.

Та вырйылын со Ленаен нырысьсэ пумиськиз. Вал со пичи дыръязы, тол куазе. Соку Дима Андреен, мукет нылпиос сямен ик, вуизы татчы нискыланы. Чапак Дима нискылтыку, Лена тубе вал. Шуккиськемзы бере сокем номыр но өз луысал, дыр, но, Леналэн жамак гинэ син улаз лыз-вож кылдйз. Нылаш соку бёрдыны ик кутскиз вал. Дима, сое адзыса, шаплы вераз: "Эн бёрды гинэ, кылйськод-а? Потэ ке, шуккы монэ. Вай, шуккы! Эн бёрды гинэ, ява?" Лена кутйз но шуккиз сое. "Тон мар-о? Вось ук!" - паймиз пияш. "Нош мыным өвөл шат? Ачид косйд ук", - вазиз нылаш. Дима мынектйз. "Серем өвөл", - вераз вал но Лена, ачиз ик пальпотйз.

- Кин пукоз на уйшор азын гурт пумын огназ инбам шоры учкыса? Дима гинэ, - бераз вазиз нылаш куара.

Пияш берытскиз. Со азын сылэ вал Лена.

- Мон тодйсько вал, тон татын луод шуыса, - будэтйз нылаш, Дима вёзы пуксем бераз.

Дима номыр но өз вазы, берыктйз синъёссэ шунды пуксён пала но тодаз вайиз Ленаен берпуметй пумиськон нуналзэс.

Соку гужемлэн берпуметй нунальёсыз мыно ни вал. Соос чошен потйзы клубысь. Крезьгур чузьяське на вал, ма, эктонни бырытозь но кема вал ай, но таослэн кошкемзы потйз вазьгес. "Эх, куазез салкым кариське ни, эшшо та нымьюс", - клубысь потэмзы бере вераз Лена но чапкиз суй вылаз кыллись кузькукез. Нылаш соку одйг дэрем коже гинэ вал. Дима вылысьтыз куртказэ куштйз но дйсьз Лена вылэ. Бертыкузы дугдйзы шур вылтй ортчись выж шоры. Лена дураз султйз но ву шоры учкиз. "Мар адзид?" - юаз Дима, вёзас султыса. "Вукузёез учкисько, - чик мынятэк вазиз нылаш. - Мыным пичи дыръям песянай весь вера вал, шур доры уйшоре потаны уг яра шуыса, а то, пе, вукузё потоз но сьöraз ву пушкы кыскоз". "Кышканэд медаз луы. Потйз ке но, мон тонэ уг сёт", - вераз пияш. Соос берытскизы но ваче азин султйзы. Дима небытак гинэ тыриз киоссэ Леналэн кус вылаз, соиз нош аслэсьтыз пияшлэн пельпумаз. Пинальёс кёня ке синъёссы шоры учкыса улйзы на но, ымдурьёссы каллен гинэ ог-огзы доры кыстйськизы. Пинальёслэсь ненег чупаськемзэс выж улысь бызисы шур но куспетй карыны өз дйсьты кадь со уе: музэн шыпытгес бызыны тыршиз. Нош чуказеяз Дима вазь чукна ик бертйз дораз - городэ. Лена изе на, дыр, шуыса, кошкиз солы жингыртытэк. Öz жингырты со бертэм бераз но. Гуртэ но со тырысен толло нуналозь өз вуылы ни.

Дима выльысь берытскиз Лена пала.

- Мон тыныд огпол ке но жингыртысал, ваньмыз мукет сяин луысал. Озы ук? - юаз со Леналэсь, чик валэктэмзэ возьматэк.

Нылаш номыр но өз вазы, кёня ке дыр ортчем бере гинэ шуиз:

- Кылем арын сомында нымьюс вал, нош туэ одйгез но өвөл, хм...

Дима учкиз нылаш шоры. Соизлэн синъёсыз ворекияло вал азьло сямен ик. Озы ик, азьло сямен, пияш кыстйськиз Лена доры. Нырысь каллен гинэ тупатйз нылашлэсь кымесаз лэзькем йырсиэ, мар бере соиз, нуныськыса, кипыдэс бордаз бамыныз лякиськиз. Небыт гинэ ымдураз чупаса, Дима каллен, вешам сямен, кизэ нылашлэн кус дорозяз лэзиз. Лена өз

палэнты сое - аслаз кыыныз пияшлэсь каньылля дэрэм бирдыоссэ пертчыны кутскиз. Пертчэм бераз, кизэ пияшлэн мугор бордаз лякиз. Дима соку, чупаськемысь дугдытэк, Ленаез улаз пачкатйз. Ымдурьёссэ чупам бераз, пумен васькиз улланьгес, каллен гинэ ымдурьёсыныз нылашлэн чырты бордаз йётскыса. Собере, озыы ик дыртытэк, лэзиз киоссэ но Леналэсь дэрэм улзэ жутйз. Шоканзы чөмгес луиз.

Султэм беразы, инбам заректэмын ни вал, шунды нош жужамын ой вал на.

- Зеч лу, Дима. Мон сярись вунэты табере. Шедьтод ай аслыд нылаш... Чебер но яратоно, мынэсьтым умойгес, - вераса куштйз Лена, ассэ тупатэм бераз.

Нош аслаз синвуосыз бызё. Собере берытскиз но гурезь уллань чаляк вамышъяса кошкиз.

Тани татын пилиськиз Дималэн сюлэмыз. Лика верам бере өз, песянаез верам бере өз. Али. Куке ачиз Лена вераз.

Сюаназы Дима өз ветлы. Дышетскыкуз со гуртэ өз ик вуылы ини. Нош дышетсконзэ быдтэм бере, диплом басьтыса, кошкиз мукет шаере, кытчы өте но кытын вазенгес ужа ни вал одйгез эшез. Дималы отын кельшиз, соин сэрен отчы ик уже интыяськиз. Чапак отын луыкуз, Дима доры вуиз көшкемыт ивор, Ленаен Андрей сюрес вылын пазьгиськиллям но кыкназы ик быриллям шуыса. Жамак бертэмез өз луы. Жыны ар ортчыса гинэ, отпуск сётэмзы бере, вуиз.

Соку сылйз шуныт гужем нунал. Дима, шайвылэ ветлэм бераз, ваське вал дор палаз. Сюресэз ортчиз Леналэн ульчаейз. Чапак солэн капка аяз Дима пумитаз Ликаез, кудйз шудэ вал луо вылын пичи пияшен.

- Чырткем, Лика, - шуиз со, дораз лыктыса.

- Умой, Дима. Вазен өм адзиське ни.

- О-о, вазен. Тон, оло, пияса вуттйд ини? - мынектйз пияш.

- Ой, тон мар вераськиськод? Со Леналэн пиез, - вазиз нылаш.

- Озыы шат. Соослэн нылпизы но кылем, иське. Мон ой тоды вал.

Дима пыдесьяськиз но пияш шоры учкиз. Пияш но со шоры учкиз.

- Чырткем, пиек. Тынад кызы-о нимыд? - юаз Дима солэсь.

- Макцим, - вазиз каллен пияш.

- Синьёсыз нош копак анаезлэн кадесь, - вераз Дима.

- Синьёсыз анаезлэн, нош ымныр тусыз чылкак тынад кадь, - шуиз Лика.

- Ой вала, - паймиз Дима.

- Со тынад пиед, Дима.

- Я, оломар но эн вераськы.

- Тон мыным вера ай, мон тонэ куке но алдай ни-а? Мыным Лена азыло ик вераз ини вал.

Дима чалмиз. Лика но номыр но өз куареты ни. Максим гинэ шудоньёсыныз каллен куашетйз. Дима учкиз со шоры. Пияш луоез, пичи куйеныз омыртыса, кисьгйз шудон

машиналэн уробояз, собере ворттйз сое кӧня ке палэнэгес, кытчы, уробозэ жутыса, кисьтйз тырем луозэ. Берлогес Дима берыктйз синьёссэ нылаш пала. Лика вал Леналэн покчи сузэрэз. Али, будэмяз, со эшшо но золгес кельше вал апаезлы. Зэм но, Лика ноку ӧз алдалля Димаез. Марысь мар луэ ке, Лика нырысь ик тырше вал Дималы вераны, юрттыны солы - нылаш пичи дырысен синмаськемын ни вал Дималы. Нош Дима сое всяк адзымтэ карылйз, апаез сьӧры бызьылйз. Али гинэ пияш валаз ай, кыче секыт вал Ликалы, солэн апаеныз ӧш луэмзылы. "Эх, умой ик тон нылаш, Лика!" - шуиз со, ӧжытак малпаськем бераз. Ӧуказеяз кошкыны дасяськись пияш таяз учыре медйз эшшо кӧня ке нуналлы кылыны.

Нош сйзыл кутскыку, соос шудйзы сюанзэс. Калыкез трос вал: быдэс гуртсы, эшшо палэнысь лыктэмьёс на. Пукизы ӧукнаозь, ӧуказеяз жыт но люкаськизы на. Ваньмыз сйзизы пинальёслы кема но шудбуру валче улон. Пинальёс нош мынекязы гинэ но куддыр, калык куремъя, чупаськылйзы. Пияшсы но сьӧрысьтызы чик ӧз кылылы - бер жытозь пукиз вӧзазы. Инкуазь но соос понна вал кадъ - нуназе ӧже, гужем куазь возыны тыршыса, пиштйз шунды, нош пуксемез бере ини, бер жыт, ворекаясь кизилиосты ворсаса, кыстйськизы пурясь пилемьёс, асэнызы валче пичи зорез вайыса. Ӧжытак гинэ музейемез коттыса, ӧукналы соос воксё ышизы, нош инбамын выльысен пиштйз шунды. Со нуналэ кин ке но рос-прос учкысал ке Дималэн но Ликалэн синьёсазы, адзысал, дыр, кызы отын пушказы кыкназылэн ик пуке пичи гинэ мырдэм адзиськымон куректон, но сычеез ӧз сюрэ. Юмшанзы удалтйз.

© *Миндэр Лев, 2012*